

Ni Presidente
Dieter F. Uchtdorf

Maikadua a Mammagbaga
iti Umuna a Pangulu



Nalikmutkadagiti Nadungngo a Takiagna

Kasla kadagiti dadduma, masansan a maparegtadak dagiti napipintas nga aramid ti arte ken musika. Naminsan a gundaway a tinakderak ti nangayed a ladawannga impinta ti maysa a Danish artist a ni Frans Schwarz a napauluan iti *The Agony in the Garden*.¹

Daytoy makasair-rikna a naipinta a ladawan ket ipakpakita na ti Mangisalakan a nakaparintumeng iti Minuyongan ti Getsemani. Bayat ti panagkarkararagna, adda iti abayna ti maysa nga anghel, a nakatengngel Kenkuana dagiti nadungngo a takiagna, a mangidiaydiaya iti liwliwa, nailangitan a tulong, ken suporta.

No nabaybayag ti panangut-utobko iti daytoy a naipinta a ladawan, ad-adda met a sumken iti pusok ken panunotko ti saan a mayebkas a rikna ti dungngo ken panagyaman. Mapadasak, uray apagapaman, ti rikna ti kaadda iti asideg ti Mangisalakan bayat ti panangirugi na iti naindaklan a pagleppasan ti aramidna iti mortalidad babaen ti panangkoti Bagina dagiti basbasol ti lubong. Masmadaawak iti awan patinggana nga ayat ken panangngaasi nga adda iti Ama para kadagiti annakna. Narimbawannak ti nalaus a panagyaman iti inaramid ti awan basolna nga Anak para iti amin a sangkatawan ken para kaniak.

Ti Sakripisio ti Anak ti Dios

Tunggal tawen iti daytoy a panawen ramrambakan ken ut-utobentayo ti sakripisio nga inaramid ni Jesucristo para iti amin a sangkatawan.

Ti inaramid ti Mangisalakan para kadatayo manipud iti Getsemani agingga iti Golgotha ket saantayto pulos a maawatan. Inako ti Bagina ti dagensen dagiti basoltayo ket nagbayad iti agnanayon ken napasingkeda a pangsubbot saan laeng a para iti sigud a naglabsingan ni Adan no di ketdi para pay kadagiti basbasol ken naglabsingan dagiti binilbilion a kararua a nagbiagen. Daytoy agnanayon, sagrado a sakripisio ti gapu ti “uray pay Dios, a kaindaklan iti amin, nga aggarigenggen gapu iti saem, ken agdara iti tunggal teterreman, ken agsagaba nga agpada ti bagi ken ti espiritu” (DkK 19:18).

Nagsagaba isuna para kaniak.

Nagsagaba isuna para kadakayo.

Aglippias ti kararuak iti panagyaman no ut-utobek ti napateg a kaipapanan daytoy a sakripisio. Daytoy ti mamagpakumbaba kaniak a mangammo nga amin nga umawat iti daytoy a sagut ket yasidegda ti puspusoda Kenkuana ket mapakawan ken maugasanda kadagiti basbasolda, kasano man ti kinangisit ti mulitda ken kasano man ti kinakaro ti dagensenda.

Makapagalintayo nga awanan iti mulit ken natarnaw manen Masubbottayo babaen ti agnanayon a sakripisio ti ay-ayatentayo a Mangisalakan.

Asino ti Mangliwliwanto Kadatayo?

Awan man kadatayo ti makapadas ti kinauneg ti sinagaba ti Apotayo, addaanto ti tunggal maysa kadatayo

iti bukod a nalidem ken narigat nga oras—panawen a ti leddaang ken ladingittayo ket kasla nakarkaro ngem iti kabaelantayo nga ibturan. Addanto dagiti panawen a ti dagsen ken rigat nga itden ti panagbabawi kadagiti basol tayo ti mangirarem nga awanan iti asi kadatayo.

Nupay kasta, no itag-aytayo ti puspustayo iti Apo bayat dagitoy a panawen, awan duadua a maammuan ken maawatannanto. Isu a nagsagaba a siaayat para kadatayo iti minuyongan ken iti krus ket dinatay panawen a malidli-dayan itan. Papiagsaen, patureden, ken bendisionannatayo. Likmutannatayonto kadagiti nadunggo a takiagna.

Ad-addanto isuna ngem iti maysa nga anghel kadatayo.

Isangbaynanto kadatayo ti liwliwa, pannakapaimbag, namnana, ken pannakapakawan.

Gapu ta Isu ti Mannubbottayo.

Ti Mangispal kadatayo.

Ti naasi a Mangisalakantayo ken manaqparabur a Diostayo.

PAGADAWAN

1. Ti padi a nagsarita iti pumpon ni Frans Schwarz kinunana “insagut ti langit ti artena ken kasla napatpateg ngem iti adu a sermon” (Emmie Buchanan-Whitlock, “History of Artists’ Lives Gives Greater Context for Exhibit,” *Deseret News*, Sept. 29, 2013, deseretnews.com).

PANANGISURO MANIPUD ITI DAYTOY A MENSAHE

Sakbay a mangisurokayo, gun-odenyoy ti pannarabay ti Espiritu tapno tulongannakayo a mangawat kadagiti umiso a kasapulan dagiti sursuruanyo. Bayat ti pangibinglayyo kadagiti adaw manipud iti mensahe ni Presidente Uchtdorf, mangiburaykayo iti pammaneknek iti Mangisalakan ken ti pangsubbot a sakripisiona. Salsodsodenyoy kadagiti sursuruanyo no ania ti kaipapanan kadakuada ti Pannubbotna ken no kasano ti nariknada iti liwliwa ti Apo kabayatan dagiti “nalidem ken narigat nga orasda.”

© 2015 ti Intellectual Reserve, Inc. Nailatang amin a karbengan. Naimaldit iti EUA. Pannakaanamongna iti Ingles: 6/14. Pannakaanamongna a maipatarus: 6/14. Pannakaipatarus ti *First Presidency Message, March 2015*. Ilokano. 12583 834

AGTUTUBO

Balligi babaen ken ni Jesucristo

Saan a naipalubos nga usaren ti nagan

Adda parikutko iti nalabes a pannangan. Ti madagdagullit a pannanganko iti nalabes ket nagbanag iti napalalo pannakasidir ti nakem, pannakapaay, ken pannakaupay. Nariknak nga agkapsutak unay idi pinadasko a parkmeken ti parikutko

Iti uneg ti nabayag a panawen naliwayak ti kinapudno a saan laeng nga isalakannatayo ti Pannubbot ti Mangisalakan no di ketsubbotennatayo pay ken pagbalinennatayo a perpekto, ken mausar pay daytoy iti nakadidillaw amadi a galad a nalabes a pannangan.

Inkeddengko nga ipaayko ti bagik iti Mangisalakanko. Nagkararagak. Sipupudno nga inawatko ti pagkapsutak ken ti panagkasapulak iti parabur, ket kalpasanna indawatko iti Nailangitan nga Ama a bendisionannak iti nadosan a Tulongna iti kabigatanna. Dayta a rabii nariknak ti pammatalged ti manangayat nga Ama ta naaddaan iti di marukod a tarigagay a mangtulong iti anakna ken iti di mapagduaduaan a bileg a mangipatungpal iti pagayatanna.

Manipud iti dayta a rabii, saanen a nalaus ti panag-gagarko a mangan iti adu. Ammok a ni Jesucristo ti gapu ti panagballigik. Kas met laeng ken ni Pablo, mamsurok a “Mabalinak dagiti amin a bambanag gapu ken Cristo a mamapigsa kaniak” Taga-Filipos 4:13). Ket ikarkarigatak a saanko a liplipatan uray kaano man ti sabali pay a leksion manipud ken ni Pablo: Agyamanak iti Dios, a nangted kadatayo iti balligi babaen ken ni Apotayo a Jesucristo” (1 Taga Corinto 15:57).

ANNAK

Liwliwaennakayto ti Mangisalakan

Saludsoden iti maysa a miembro ti familia wenggayem maipapan iti maysa a panawen idi isu ket nariknana a liniwliwa ti Mangisalakan. Padasenyo a panunoten ti maysa a panawen idi liniwliwanakayo ti Mangisalakan. Mabalinyo ti mangidrowing iti maysa a ladawan ti padas ket isab-ityo iti abay ti katreyo tapno mangipalagip kadakayo nga adda a kanayon ni Jesucristo sadiay a mangliwliwa kadakayo.



Pammati, Pamilia, Tulong

Dagiti Kababalin ni Jesucristo: Naunday a Panagitured ken Naanus

Nainkararagan nga adalenyo daytoy a material ken kalikagumanyo nga ammuen no ania ti ibinglayyo. Kasano a ti pannakaawatyo iti biag ken mision ti Mangisalakana ket mangpapiagsa iti pammatiyo Kenkuana ken mangparabur kadagiti ay-aywananyo babaen ti visiting teaching? Para iti ad-adu pay nga impormasion, mapan iti reliefsociety.lds.org.

Daytoy ti paset ti maysa a serye dagiti Mensahe iti Visiting Teaching a mangitampok kadagiti kababalin ti Mangisalakana.

Ti kinaanus masansan a maipagarup a kas naulimek, awan ganaygayna nga ugali, ngem ni Presidente Dieter F. Uchtdorf, Maikadua a Mamagbaga iti Umuna a Pangulueng, kinunana, “Ti panaganus ket saan nga awan ganaygayna a panaglusulos, wenno pannakapaay nga agtignay gapu kadagiti panagmaktayo. Ti kinaanus ket kayatna a sawen a naregta nga agur-uray ken managibtur. Kayatna a sawen a panagtalinaed iti maysa a banag . . . uray no maitantan dagiti tartarigagayan ti puspusotayo. Ti kinaanus ket saan laeng a panagitured; daytoy ti panagitured a naimbag!”

Iti biagtayo sakbay daytoy a biag, nangisagana ti Nailangitan nga Amatayo iti maysa a plano para kadatayo—nga espiritu nga annakna—ket impukkawtayo ti rag-o iti gundaway nga umay iti daga (kitaen iti Job 38:7). No piliientayo nga isurot ti pagayatantayo iti pagayatanna bayat ti panagbiagtayo iti daga, “aramidenna[tayo] a ramit kadagitiima[na] iti pannakaisalakan ti adu a kararua” (Alma 17:11).

Intuloy ni Presidente Uchtdorf, “Ti kinaanuskayatna a sawen ti panagawat iti dayta saan a mabalaliwan

ken panangsango daytoy nga adaan iti tured, parabur, ken pammati. Kayatna a sawen ti ‘siaayat a mangtungpal iti amin a banag a makita ti Apo a rumbeng nga ipabaklay [kadatayo], kas iti ubing a natulnog iti amana’ [Mosiah 3:19]. Kangrunaanna, ti kinaanus kayatna a sawen ti panagbalin a ‘nakired ken natibker, ken saan a maisin iti panagtungpal kadagiti bilin ti Apo’ [1 Nephi 2:10] tunggal oras ti inaldaw, uray no nari-gat nga aramiden daytoy.”¹

Dagiti Mainayon a Nasantuan a Kasuratan

Salmo 40:1; Taga Galacia 5:22–23; 2 Pedro 1:6; Alma 17:11

Manipud kadagiti Nasantuan a Kasuratan

Ibaga dagiti nasantuan a kasuratan kadatayo nga iti biagtayo iti daga, nasken nga “aganustayo kadagiti rigigattayo, ta adunto ti lak-amen[tayo.]” Impaayannatayo ti Dios iti daytoy makaliwliwa a kari, “Ibturam ida, ta, adtoy, addaak kenka, agingga iti gibus dagiti al-dawmo” (DkK 24:8).

Ti sumaganad nga estoria ti Biblia ket pagwadan ti kinaanus ken pammati.

“Ket maysa a babai nga agsagsagaba iti panagbulos ti darana iti uneg ti sangapulo-ket-dua a

tawenen . . . sinagidna ti gayadan ti pagan-anay ni [Cristo] ket naidgiddato a nagsardeng ti panagbulos ti darana.

“Ket kinuna ni Jesus, . . . Adda nangsagid kaniak: ta nariknak nga adda rimmuar a pannakabalinal kaniak.

“Ket idi makita ti babai a saan a makalinged, immay nga agpigpigerger, ket nagrukno iti sanguananna, ket imbagana iti sanguanan dagiti amin nga umili ti gapu ti nangsagidanna kenkuana ken ti pannakaigiddatona a napaimbag.

“Ket isu kinunana, Anakko, ti pammatim pinasalun-atnaka; inkan a sitatalna” (Lucas 8:43–48).

Kas kenkuana, makasarak-tayo kadagiti bendision ken liwliwa, ken uray pay pannakapaimbag, no umasidegtayo ken Jesucristo—a ti Pannubbotna ket mapaimbagnatayo.

PAGADAWAN

1. Dieter F. Uchtdorf, “Continue in Patience,” *Liahona*, Mayo 2010, 57, 59.

Ibilang Daytoy

Manipud iti pakasaritaan iti Lucas 8, kasano a nangunggonan ti nabayag a panaganus daytoy a babai ket kalpasanna ti pammatina ken ni Jesucristo?